

四庫全書

子部

欽定四庫全書

農政全書卷三十五

明 徐光啟 撰

蠶桑廣類

木棉

禹貢曰島夷卉服厥篚織貝

蔡沉傳曰卉服葛及木棉之屬南夷木棉之精好者

亦謂之吉貝以卉服來貢而吉貝之精者則入篚焉

裴淵廣州記曰蠻夷不蠶採木棉為絮方勺泊宅編

曰南海蠻人以木棉紡織為布布上出細字雜花尤工巧名曰吉貝布即古白纁布也 范政敏遜齋閒覽曰

林邑等國出吉貝布木棉為之南州異物志曰木棉  
吉貝木所生熟時狀如蓂莢細過絲綿中有核如珠珣  
用之則治出其核皆用輾軸今用攪車尤便但紡不績  
任意外抽牽引無有斷絕其為布曰斑布紫縐多巧曰  
城次麗者曰文縐又次麗者曰烏騏張勃吳錄曰文  
趾定安縣有木棉樹高丈實如酒杯口有絲如蠶之絲  
也又可作布名曰白縐一名毛布諸蕃雜志曰木棉  
吉貝木所生占城閩婆諸國皆有之今已為中國珍貨  
但不自本土所產不能足用李延壽南史曰高昌國  
有草實如薊中絲為細纏名曰白疊取以為帛甚軟白  
沈懷遠南越志曰桂州出古終藤結實如蓂莢核如  
珠珣治出其核約如絲綿染為斑布李時珍本草綱  
目曰木棉有草木二種交廣木綿樹大如抱其枝似桐  
其葉大如胡桃葉入秋開花紅似山茶花黃藍花片極  
厚為房甚繁短側相比結實大如拳實中有白綿綿中  
有子今人謂之斑枝花訛為攀枝花江南淮北所種木

棉四月下種莖弱如蔓高者四五尺葉有尖如楓葉入秋開花黃色如葵花而小亦有紅紫者結實大如桃中有白綿綿中有子大如梧子亦有紫綿者八月採棣謂之綿花然則張勃所謂木棉蓋指似木之木棉也李延壽沈懷遠所謂木棉則指似草之木棉也此種出南蕃宋末始入江南今則偏及江北與中州矣不蠶而綿不麻而布利被天下其益大哉又南越志言南詔諸蠻不養蠶惟收娑羅木子中白絮紉為絲織為幅名娑羅龍段祝穆方輿志言平緬出娑羅樹大者高三五丈結子有紉綿織為白纁名梵羅綿此亦斑枝花之類各方稱呼不同耳玄扈先生曰吉貝之名獨昉于南史相傳至今不知其義意是海外方言也小說家所謂木棉其所謂布曰絨曰文縐曰烏騏曰斑布曰白氈白縠曰屈胸者皆此故是草本而吳錄稱木棉者南中地煖一種後開花結實以數歲計頗似木芙蓉不若中土之歲一下種也故曰十餘年不換明非木本矣吉貝之稱木

即禹貢之言卉取別于蠶綿耳閩廣不稱木棉者彼中  
稱攀枝花為木棉也攀枝花中作裯褥雖柔滑而不韌  
絕不能牽引豈堪作布或疑木棉是此謂可為布而其  
法不傳非也吳錄所言木棉亦即是吉貝或疑其云樹  
高丈當是攀枝不知攀枝高十數丈南方吉貝數年不  
凋其高丈許亦不足怪蓋南史所謂林邑吉貝吳錄所  
謂永昌木棉皆指草木之木棉可為布意即娑羅木然  
與攀枝花絕不類又中土所織棉布及西洋布精麗不  
等絕無光澤而余見曹溪釋惠能所傳衣曰屈胸布即  
白氍毹布云是西域木棉心所織者其色澤如蠶絲豈即  
娑羅籠段邪抑西土吉貝尚有他種耶又嘗疑洋布之  
細非此中吉貝可作及見榜葛刺吉貝其核絕細綿亦  
絕軟與中國種大不類乃知向來所傳亦非其佳者  
又曰中國所傳木棉亦有多種江花出楚中棉不甚重  
二十而得五性強紫北花出畿輔山東柔細中紡織棉  
稍輕二十而得四或得五浙花出餘姚中紡織棉稍重

二十而得四天下種大都類此更有數種稍異者一曰黃蒂穰核細黃色如粟米大棉重一曰青核核青色細于他種棉重一曰黑核核亦細純黑色棉重一曰寬大衣核白而穰浮棉重此四者皆二十而得九黃蒂稍強緊餘皆柔細中紡織堪為種又一種曰紫花浮細而核大棉輕二十而得四其布以製衣頗朴雅市中遂染色以售不如本色者良堪為種又曰余見農人言吉貝者即勸令擇種須用青核等三四品棉重倍入矣或云凡種植必用本地種他方者土不宜種亦隨地變易余深非之乃擇種者竟獲棉重之利三五年來農家解此者十九矣嗚呼即如彼言吉貝自南海外物耳吾鄉安得而有之而今且奄有下土衣被九有哉又曰嘉種移植間有新變者如吉貝子色黑者漸白棉重者漸輕也然在近地不妨歲購種稍遠者不妨數歲一購其所由變者大半因種法不合間因天時水旱其緣地方而變者十有一二耳

孟祺農桑輯要曰栽木棉法擇兩和不下濕肥地於正月地氣透時深耕三遍擺蓋調熟然後作成畦畛每畦長八步闊一步內半步作畦面半步作畦背不斷二遍用耙耨平起出覆土於畦背上堆積至穀雨前後揀好天氣日下種先一日將已成畦畛連澆三次用水淘過子粒堆於濕地上瓦盆覆一夜次日取出用小灰搓得伶俐看稀稠撒於澆過畦內將元起出覆土覆厚一指再勿澆待六七日苗出齊時旱則澆溉鋤治常要潔淨

概則移栽稀則不須每步只留兩苗稠則不結實苗長高二尺之上打去衝天心旁條長尺半亦打去心葉葉不空開花結實直待綿欲落時為熟旋熟旋摘隨即攤于箔上日曝夜露待子粒乾取下用鐵杖一條長二尺麁如指兩端漸細如趕餅杖樣用梨木板長三尺闊五寸厚二寸做成床子逐旋取綿子置於板上用鐵杖回旋趕出子粒即為淨綿撚織毛絲或綿裝衣服特為輕暖



王禎農桑通訣曰木棉穀雨前後種之立秋時隨獲隨收其花黃如葵其根獨而直其樹不貴乎高長其枝幹貴乎繁衍不由宿根而出以子撒種而生所種之子初收者未實近霜者又不可用惟中間時月收者為上須

經日晒燥帶綿收貯臨種時再晒旋碾即下

玄扈先生曰此處冬

月碾子收藏風日所侵恐致油浥若受水濕仍當鬱爛故也余聞老農云棉種必於冬月碾取謂碾必須晒秋冬生氣收斂于時晒曝不傷萌芽春間生意茁發不宜大晒也二說皆有理余意謂春碾者秋收時間取種棉曝極乾置高燥處臨種時略晒即碾當無害秋碾者碾下種用草裹置高燥處不受風日水濕可無鬱浥惟春

時旋買棉花礮作種即不可恐是陳棉或嘗受濕蒸故  
若旋買棉核作種尤不可恐是陳核或經火焙故今意  
創一法不論冬礮春礮收藏旋買但臨種時用水泡濕  
過半刻淘汰之其批者遠年者火焙者油者鬱者皆浮  
其堅實不損者必沉沉者可種也又曰木棉核果當年  
者亦須淘汰擇取浮者批種也其羸種亦沉取其沉者  
微揠之羸者殼軟而仁不滿其堅實者乃佳或疑導擇  
損功此不足慮也若依世俗密種畝用子數升誠難果  
如法料間三尺撒種之畝用子一升以外足矣其種本南海諸國所產後福建

諸縣皆有近江東陝右亦多種滋茂繁盛與本土無異  
種之則深荷其利悠悠之論率以風土不宜為說按農  
桑輯要云雖託之風土種藝不謹者有之種藝雖謹不

得其法者有之信哉言也

元龜先生曰農桑輯要作于元初當時便云木棉種陝右

行之其他州郡多以土地不宜為解獨孟祺苗好謙暢師文王禎之屬能排貶其說抑不知當時之人果以數子為是耶否耶至于今率土仰其利始信數君子非欺我者嗚呼豈獨木棉哉後之視今猶今之視昔也

便民圖纂曰棉花穀雨前後先將種子用水浸片時漉

出以灰拌勻候芽生於糞地上每一尺作一穴種五七

粒待苗出時密者芟去止留旺者二三科頻鋤時常搗

去苗尖勿令長太高若高則不結子至八月間收花元

先生曰木棉一步留兩苗三尺一株此相傳古法依此則能耐旱肥而多收圖纂作于近代云一尺一穴者

太密此邇來稠種少收之濫觴也又曰吳人云千粒萬  
粒不如密花此言最害事稀不如密者就極瘠下田言  
之所謂瘠田欲稠也田之肥瘠在糞多寡在人勤惰耳  
已則瘠之而稠之自今薄收非最下情農當作此語邪  
若田肥自不得密密則青酣不實實亦生蟲故稀種則  
能肥肥則實繁而多收今肥田密種者既無行次稍即  
強弱相害苗愈長愈不忍痛芟之櫛比而生不交遠風  
雖望之鬱蔥而有葉無枝有花無實矣既慮其然則瘠  
其苗非從事之下邪棉之幹長數尺枝間數尺子百顆  
畝收二三石其本性也今人密種少收皆其大闕不遂  
者耳齊魯人種棉者既壅田下種率三尺留一科苗長  
後籠乾真視苗之瘠者輒壅之畝收二三三百斤以為常  
餘姚海鹽之人種棉極勤亦二三尺一科長枝布葉科  
百餘子收極早亦畝得二三百斤其為畦廣丈許中高  
旁下畦間有溝深廣各二三尺秋葉落積溝中爛壞冬  
則就溝中起生泥壅田歲種蠶豆至春翻卷作壅即地

虛行根極易又極深則能久雨能久旱能大風此皆稀種故能肥能肥故多收若如吾鄉之密種而又用齊魯之糞肥餘姚之草肥安得不青酣不蟲蟲耶但慮酣之為患不知稀之得力又慮稀之少收不知肥之得力人情之習于故常如此哉彼兩方人聞吾鄉之密種薄收也每大笑之

張五典種法曰種之時在清明穀雨節以霜氣既止也種之力或生地用糞耕蓋後種或花苗到鋤三遍高聳每根苗邊用熟糞半升培植鋤非六七遍盡去草茸不可種之疎密苗初頂兩葉時止剗去草顆宜密留以備死傷再鋤尚宜稍密三鋤則定苗顆宜疎不宜密大約

每花苗一顆相拒八九寸遠斷不可兩顆連並苗之去  
葉心在伏中晴日三伏各一次有苗未長大者隨時去  
之花性忌燥燥則濕烝而桃易脫落花忌苗並則直  
起而無旁枝中下少桃種不宜晚晚則秋寒早則桃多  
不成實即成亦不甚大而花軟無絨去心不宜於雨暗  
日雨暗去心則灌聲而多空榦此北方種花法也北方  
地高寒尚宜若此況此中地濕燥何可不以北法行之

按張山東信陽人萬厯乙卯按吳行部至海上時六月  
初察視田間花苗多穉弱恨其三五為族即根以上尺

許無舊苗恨其密也曰江左賦繁役重全賴田收而樹  
蕪無法歲得半入此傷農之大者極論其理甚詳悉手  
書此則刻而傳之海上官民軍竈墾田幾二百萬畝大  
半種棉當不止百萬畝若此言必行畝益棉三十斤足  
供賦額五十斤足餘役豐歉獲  
收家戶殷給悉仁言之利矣

玄扈先生曰棉花密種者有四害苗長不作蓓蕾花開  
不作子一也開花結子雨後鬱烝一時墮落二也行根  
淺近不能風與旱三也結子暗蛀四也

又曰總種棉不熟之故有四病一穉二密三瘠四蕪穉  
者種不實密者苗不孤瘠者糞不多蕪者鋤不數

又曰凡田來年擬種稻者可種麥擬棉者勿種也諺曰  
歇田當一熟言息地力即古代田之義若人稠地狹萬  
不得已可種大麥或裸麥仍以糞壅力補之決不可種  
小麥凡高仰田可棉可稻者種棉二年翻稻一年即草  
根潰爛土氣肥厚蟲螟不生多不得過三年過則生蟲  
三年而無力種稻者收棉後周田作岸積水過冬入春  
凍解放水候乾耕鋤如法可種棉蟲亦不生

又曰棉田秋耕為良獲稻後即用人耕又不宜耙細須



大塹岸起令其凝沍來年凍釋土脉細潤正月初轉耕  
或用牛轉二月初再轉此二轉必撈蓋令細清明前作  
畦畛土欲絕細畦欲闊溝欲深既作畦便于白地上鋤  
三四次雨後鋤為良則土細而草除鋤白一當鋤青二  
去草自其芽蘖故

又曰凡棉田于清明前先下壅或糞或灰或豆餅或生  
泥多寡量田肥瘠剉豆餅勿委地仍分定畦畛均布之  
吾鄉密種者不得過十餅以上糞不過十石以上懼太

肥虛長不實實亦生蟲若依古法苗間三尺不妨一再  
倍也有種晚棉用黃花苕饒草底壅者田擬種棉秋則  
種草來年刈草壅稻留草根田中耕轉之若草不甚盛  
加別壅欲厚壅即並草掩覆之或種大麥蠶豆等並掩  
覆之皆草壅法也草壅之收有倍他壅者惟生泥棉所  
最急不論何物壅必須之故姚江之畦間有溝最良法  
凡水土氣過寒糞力盛峻熱生泥能解水土之寒能解  
糞力之熱使實繁而不蠹諺曰生泥好棉花甘國老但

下糞須在壅泥前泥上加糞併泥無力

又曰種棉有漫種者易種難鋤穴種者反之漫種者下種宜密鋤時簡別而痛芟之令絕疎穴種者穴四五核鋤時簡別去留之留不得過二留二者高五六寸則以塊亞其中而平分之使根幹相去面面生枝終不如孤生者良簡別之法老農云一二次鋤去大葉者此大核少棉種也三鋤後去小葉者此秕不實種也或實而油浥病種也第此為雜種言耳若純用黑核等佳種精擇

之自無大核雜種即全去小者

又曰棉子用臘雪水浸過不蛀亦能旱或云鰻魚汁浸之凡種皆然種棉須土實漫種者既覆土用木碌礮實之穴種者覆土後以足踐之

又曰苗高二尺打去衝天心者令旁生枝則子繁也旁枝尺半亦打去心者勿令交枝相揉傷花實也摘時視苗遲早早者大暑前後摘遲者立秋摘秋後勢定勿摘矣摘亦不復生枝

又曰鋤棉須七次以上又須及夏至前多鋤為佳諺曰  
鋤花要趁黃梅信鋤頭落地長三寸

又曰鋤棉者功須極細密昔有人傭力鋤者密埋錢于  
苗根鋤者貪覓錢深細爬梳棉則大熟

又曰棉田溝側勿種豆疑慮傷災利其微獲者是下農  
夫也畦中尺寸空餘少俟即枝條森接補豆一簇并害  
傍苗十數尤癡絕赤豆害棉更甚

又曰凡種植以旱為良吾吳濱海多患風潮若比常時

先種十許日到八月潮信有旁根成實數顆即小收矣  
但早種遇寒苗出多死今得一法於舊冬或新春初耕  
後畝下大麥種數升臨種棉轉耕并麥苗掩覆之麥根  
在土棉根遇之即不畏寒麥兼四氣之和性故能寒也  
用此法可先他田半月十日種

又曰今人種麥雜棉者多苦遲亦有一法預于舊冬耕  
熟地穴種麥來春就于麥隴中穴種棉但能穴種麥即  
漫種棉亦可刈麥

又曰吉貝遇大水淹沒七日以下水退尚能發生若淹過八九日水退必須翻種矣遇大旱庠水潤之但庠水後一兩日得雨後損苗須較量陰晴方可車庠若能稀種行根深遠即車後得雨亦無妨也

陶九成南村輟耕錄曰松江府東去五十里許曰烏泥涇其地土田磽瘠民食不給因謀樹藝以資生業遂覓木棉之種初無踏車椎弓之製率用手剖去子線弦竹弧置案間振掉成劑厥功甚艱國初時有嫗黃婆者自

崖州來乃教以作造桿彈紡織之具至於錯紗配色綜  
綾挈花各有其法以故織成被褥帶幌其上折枝團鳳  
棋局字樣粲然若寫人既受教競相作為轉貨他郡家  
既就殷未幾嫗卒莫不感恩灑泣而共葬之又為立像  
祠焉越三十年祠毀鄉人趙愚軒重立

丘濬大學衍義補曰按自古中國布縷之征惟絲枲二  
者而已今世則又加以木棉焉唐人調法民丁歲輸絹  
綾絁及綿輸布及麻是時未有木棉也宋林勲作政本



書匹婦之貢亦惟絹與綿非蠶鄉則貢布麻元史種植之制丁歲種桑棗雜果亦不及木棉則是元以前未始以為貢賦也考之禹貢揚州島夷卉服註以為吉貝則虞時已有之島夷時或以充貢中國未有也故周禮以九職任民嬪婦惟治蠶桑而無木棉焉中國有之其在宋元之世乎蓋自古中國所以為衣者絲麻葛褐四者而已漢唐之世遠夷雖以木棉入貢中國未有其種民未以為服官未以為調宋元之間始傳其種入中國關

陝閩廣首得其利益此物出外夷閩廣海通舶商關陝  
壤接西域故也然是時猶未以為征賦故宋元史食貨  
志皆不載至我國朝其種乃徧布于天下地無南北皆  
宜之人無貧富皆賴之其利視絲枲蓋百倍焉故表出  
之使天下後世知卉服之利始盛于今代

玄扈先生曰  
陶宗儀稱松

江以黃嫗故有棉布之利而仲深先生亦云其利視絲  
枲百倍此言信然其利今不在民矣嘗攷宋紹興中  
松郡稅糧十八萬石耳今平米九十七萬石會計加編  
徵收耗剝起解鋪墊諸色役費當復稱是是十倍宋也  
壤地廣袤不過百里而遙農畝之入非能有加于他郡  
邑也所繇共百萬之賦三百年而尚存視息者全賴此

一機一行而已非獨松也蘇杭常鎮之幣帛系紵嘉湖之絲纈皆恃此女紅木業以上共賦稅下給俯仰若求諸田畝之收則必不可辦故論事者多言東南之民勤力以事上比于孝子順孫不虛耳松江志又言綾布二物衣被天下原此中之布實不如西洋之麗密曾見浙中一縷細布亦此中所未見者徒以家紡戶織遠近通流遂以為壤莫為利源也第事勢推移無數百年不變者元人稱關陝而外諸郡土地不宜吉貝識者非之今之藝吉貝者所在而是焉何樹藝之獨然而織維之獨不然也耶安能禁他郡邑之人不為黃姬邪今北土之吉貝賤而布貴南方反是吉貝則汎舟而鬻諸南布則汎舟而鬻諸北此皆事之不可解者若以北之棉穀南之織豈不反賤為貴反貴為賤余居恒謂北方之人必有從事者若彼土風高不能抽引此語誠然顧豈無善巧之法而總料其不然亦未免為悠悠之論故常揣度後此數十年松之布當無所洩無所洩即無以上共賦

稅下給俯仰宜當早為計者人情多未以為然也而數年來肅寧一邑所出布疋足當吾松十分之一矣初猶莽莽今之細密幾與松之中品埒矣其值僅當十之六七則向所云吉貝賤故也夫以一邑漸及之他邑何難既能其一進之其十何難由下品而中由中品而上何難吾欲利而能謂人已邪北土既爾他方復然則後此數十年松之布竟何所洩哉至于此即當事者必有輕重經通之策第吾儕自朝謀夕竊謂宜及今兼事蠶桑以濟布疋之窮或者又復以土地不宜為言嗚呼慮始之難甚哉昔人有言未事豫言固常為虛及其已至又無所及余唯幸余言之不驗也夫即余言之不驗而以數十日之功收蠶桑之利餘日以事紡織亦安所不便乎

玄扈先生曰近來北方多吉貝而不便紡織者以北土

風氣高燥綿毳斷續不得成縷縱能作布亦虛疎不堪用耳南人寓都下者多朝夕就露下紡日中陰雨亦紡不則徙業矣南方卑濕故作縷緊細布亦堅實今肅寧人乃多穿地窖深數尺作屋其土檐高于平地僅二尺許作窻櫺以通日光人居其中就濕氣紡織便得緊實與南土不異若陰雨時窖中濕蒸太甚又不妨移就平地也初始何人殊有意致但南中用糊有二法其一先將綿維作紋糊盆度過復于撥車轉輪作維次用經車

縈迴成絛吳語謂之漿紗其一先將綿繅入經車成絛  
次入糊盆度過竹木作架兩端用緯急維竹帚痛刷候  
乾上機吳語謂之刷紗南布之佳者皆刷紗也今肅寧  
尚未作此亦緣風土高燥塵沙坐起故耳法當如前作  
窖令長二三十丈廣三四丈冒以長廊循檐作窻櫺開  
闔以避就風日于中經刷或輕陰無風纖塵不起亦不  
妨移向平地若作如此方便其成布當盛吳下第功力  
頗費當如農桑輯要所云義桑之法聚衆力成之若有

力者作此計日賃用亦大收僦直也農桑通訣所載攪車用兩人今止用一人紡車用三維今吳下猶用之間有容四維者江西樂安至容五維往見樂安人于馮可大所道之因託可大轉索其器未得更不知五維向一手間何處安置也聊舉一二其他善巧所在有之且智巧日窮不盡後之制作若能虛訪勤求即吳宮機絕尚有進乎技者何況其他嗟乎又豈直杼軸之間蕞爾細事已哉

孟祺農桑輯要言一步留兩苗又言旁枝長尺半亦打去心此為每科相去皆三尺古法也便民圖纂言每一尺作一穴此為每科相去皆一尺近法也今或相去二三寸一二寸乃至三五成族是謂無法自取薄收耳祺又言苗長二尺打去衝天心此亦古法須三伏者方盛長時令旁生枝也吾鄉人知去心者百中有二三然非早種稀留肥壅亦自無由高大去心何益北土用熟糞者堆積乾糞覆踰時熱烝已過然後用之勢緩而力



厚雖多無害南土無之大都用水糞豆餅草歲生泥四  
物水糞積過半年以上與熟糞同此既難得旋用新糞  
畝不能過十石過則青酣一為糞性熱一為花科密也  
豆餅亦熟畝不能過十餅過者與糞多同病若能稀種  
科間一尺此二物者可加一倍間二尺可加三倍間三  
尺可加五倍也更易于冬春下壅後耕蓋之可加至十  
倍既不傷苗二三年後尚有餘力矣草壅甚熟過于糞  
餅糞因水解餅亦勻細草壅難勻當其多處峻熱傷苗

故有時倍收有時耗損用此一物特宜詳慎生泥者或開挑溝底或畧取草泥罨蒸去熱此種最良凡先下糞餅草蕖用此覆之大能緩其勢益其力姚江法全用草壅加以生泥科間二尺方之吾鄉畝收數倍也蓋生泥中具有水土草蕖和合淳熟其水土能制草蕖之熱草蕖能調水土之寒故良農重之有國老之稱矣余勸人稀種棉本疏中言之詳矣余法須苗間三尺或未信宜先一尺二尺試之今更有一論推明必然之理吾鄉種

棉花極稔時間有一二大株俗稱為花王者於幹上結實旁枝甚多實亦多人以為神異賽祭祈禱或罄其所入此至愚也余謂下一花子便當得一花王其不花王者皆夫閼不遂者耳意此中花種久受屈抑少全氣之核種之又遲又密又瘦故皆不獲遂其本性萬一中有豐滿之核種復早又偶值稀疏之虞偶遇肥饒之地偶當豐稔之時此四五事皆相得則花王矣然安能一一湊合若此所為萬萬中有一而花王絕少也若依吾法

歲歲擇種取其高大繁實者特留作種淘汰擇取精核  
又早種科間三尺科用糞數升而遇豐年豈不遍地花  
王哉即歉歲亦數倍恒時矣若不信此言請詳花王何  
物試言其理花合有王他卉木不合有王乎他卉木能  
遂其性者多矣獨花木也必予地三尺而後可按柱史  
所疏種花法異吾土者略有三指一曰稀二曰肥三曰  
早稀之為利稀則耐肥而能為利余既備論之今特論  
所云早者按吾鄉北極出地三十度山東濟南三十六

度相去六度寒煖甚懸絕杜史言其邑陽信俱于清明種木棉無過穀雨者則吾鄉當在清明前無疑但此時霜信未絕苗出土經霜則萎今定于清明前五日為上時後五日為中時穀雨為下時決不宜過穀雨矣如此早種即早實早收縱遇風潮之年亦有近根之實不至全荒也吾鄉向稱早種者在立夏前遲或至小滿後詢其緣由皆不獲已其一為惜麥北方地寬絕無麥底花得早種吾鄉間種麥雜花者不得不遲今請無惜麥必

用荒田底即種麥亦空穴種可得早種花後收麥旋以厚壅起之也其一為力不辦翻耕北土堅強兼少梅雨故早種無耗損栽及夏至已得結桃南土虛浮濕蒸翻耕首年十全無患三年以後土仍虛浮復生地蠶早種者或遇梅雨濯露其根遂多萎壞或遇地蠶斷根食葉一蟲之害亦地步武今請數翻耕即不辦亦宜冬濯春耕以實其田殺其蟲又不辦亦宜穴種花令根深不至濯露可無死慮蟲傷者耕地訖將種再耕之勞之殺其

蟲既被蟲食者檢殺其蟲移栽補之但今人不知擇種  
即秕者半不秕之中贏者半凡遇梅雨輒死或梅中草  
盛輒死皆贏種而咎早種乎此物即不死亦少成少實  
凡密種者其地力人力糞力半為此物所耗豈不可惜  
故擇種要矣又孟祺言概則移栽棉花帶土移栽一體  
成實人言茶與棉移栽不生皆妄也移栽不生亦贏種  
稠生故耳不移栽旋下子補種又晚矣大抵棉花早種  
必是晚種必非吾輩宜據理商求以圖成早種之是勿

執辭推諉以曲蓋晚種之非明此義者視世間萬事盡然何獨蓺棉而已乎

每見議者執言此中棉花早種多死立夏前後種者即不死此寒凍所致乃山東相去六度更寒清明下種却不死其理難明也深求其故所以不禁寒凍者大抵由於根淺根淺之緣復有數事一者種病二者漫種浮露三者太密四者太瘦種病如胎疴更少壅兩者皆無力可生根漫種者子粒浮露根不入土密則無處行根根



不遠不遠亦不深故雨濯其根風寒中其根多立死凡種樹須築實其根土若有罅風中其根亦死此恒理也犯此多病時在死法中更梅時鋤却一再遍土尤虛浮淒風寒雨十日半月苗葉有餘根力不足故早種者中寒則死梅中尤多死反不若遲種者根苗俱穉與草同生過梅天已入盛夏不懼寒凍可得苟全也而生計薄矣譬人通身是疾不禁霧露晏行早宿行路無幾何如不病者櫛風沐雨日中而趨百里乎欲求不病擇種一

矣稀二矣厚壅三矣穴種者下種後覆土一指足踐實之漫種者下子後亦覆土厚一指木礪礪實之若能穴種復作畦壟者苗生耨壟草遺土附苗根也四矣此四法者皆令根深能風雨亦且能旱即早種何慮死其他蟲傷草熱則人事不精非關寒凍畧見上文未遑具論也舊傳早種一法擬種棉地先耕地種大麥轉耕並麥苗掩覆之耙蓋下種餘姚亦早種棉却先種蠶豆轉耕掩覆之二法略同此是何理蓋皆令地虛苗得深遠行

根便能寒且能風雨旱亦深根之義耳且隨地翻耨草壅必勻勝刈他草下壅餘姚法耨豆後仍上生泥泥不止去草熟亦令草少蟲少種疊地花者不可不知

余為吉貝疏說棉頗詳恐不能徧農家茲刻宜可遍或不逮不知書者今括之以四言儻知書者口授之婦女嬰兒必可通也曰精揀核早下種深根短幹稀科肥壅王禎木棉圖譜叙曰中國自桑土既蠶之後惟以繭續為務殊不知木棉之為用夫木棉產自海南諸種藝制

作之法駸駸北來江淮川蜀既獲其利至南北混一之

後商販於此服被漸廣名曰吉布又曰棉布

考之異物志云木棉

之為布曰斑布繁縟多巧者曰城次  
簾者曰文縐又次簾者名曰烏驕

其幅足之制特為

長濶茸密輕暖可抵繒帛又為毳服毯段足代本物按

裴淵廣州記云蠻夷不蠶採木棉為絮又諸番雜志云


木棉吉貝木所生占城閩婆諸國皆有之今已為中國

珍貨但不自本土所產不能足用比之蠶桑無採養之

勞有必收之效埒之泉苧免績緝之工得禦寒之益可

謂不麻而布不繭而絮雖曰南產言其通用則北方多寒  
或繭績不足而裘褐之費此最省便列製造之具於此  
庶遠近滋習農務助桑麻之用華夏兼蠻夷之利將自  
此始矣

木綿攪車




木棉攪車木棉初採曝之陰或焙乾用此以治出其核  
昔用輶軸今用攪車尤便夫攪車用四木作框上立二  
小柱高約尺五上以方木管之立柱各通一軸軸端俱  
作掉拐軸末柱竅不透二人掉軸一人喂上棉英二軸  
相軋則子落於內綿出於外比用輶軸工利數倍

凡木棉多

用此法即去子  
得棉不致積滯

玄扈先生曰今之攪車以一人當三人矣所見白容式  
一人可當四人太倉式兩人可當八人

木綿彈弓





木棉彈弓以竹為之長可四尺許上一截頗長而彎下一截稍短而勁控以繩絃用彈棉英如彈氈毛法務使結者開實者虛假其功用非弓不可


玄扈先生曰今以木為弓蠟絲為弦

木綿捲筵



木棉捲筵淮民用葛忝梢莖取其長而滑今他處多用  
無節竹條代之其法先將綿毳條於几上以此筵倦而  
扞之遂成綿筒隨手抽筵每筒牽紡易為勻細皆捲筵  
之效也

木綿紡車




木棉紡車其制比麻苧紡車頗小夫輪動弦轉苧羅隨之紡人左手握其綿筒不過二三績於苧羅牽引漸長右手均攤俱成紫纓就繞羅上欲作線織置車在左再將兩羅線絲合紡可為綿線南州異物志曰吉貝木熟時狀如鷺毳但紡不績任意外抽牽引無有斷絕此即紡車之用也

玄扈先生曰置車在左不便若轉輪右旋可作亦不便今人以線為絃繞苧一周下成單繳即輪右左轉而能

括筭右旋矣




木綿撥車





木綿撥車其制頗肖麻苧幡車但以竹為之方圓不等  
特更輕便按舊說先將紡訖綿維於稀糊盆內度過稍  
乾然後將綿維頭縷撥於車上遂成綿絰

木綿軋床




木棉輶床其制如所坐交椅但下控一輶四股輶軸之末置一掉枝上椅豎列八維下引綿絲轉動掉枝分絡輶上絲絰既成次第脫卸比之撥車日得八倍始出閩建今欲傳之他方同趨省便詩云八維綿絲絡一輶巧憑坐椅作輶床試將觸類深思索麻苧鄉中用亦良

木綿線架


木綿線架

農政全書

三



木綿線架以木為之下作方座長濶尺餘卧列四維座上鑿置獨柱高可二尺餘柱上橫木長可二尺用竹篾均列四彎內引下座四維紡於車上即成綿線舊法先將此維絡於簍上然後紡合今得此制甚為速妙



農政全書卷三十五

欽定四庫全書

子部

農政全書卷三十六  
七

詳校官中書臣寶汝翼

編修臣倉聖脈覆勘

總校官進士臣朱 鈐

校對官中書臣高 中

謄錄監生臣王嘉稷

繪圖監生臣寶光國

欽定四庫全書

農政全書卷三十六

明 徐光啟 撰

蠶桑廣類

麻

苧麻

大麻

蘇麻

葛附

苧麻爾雅曰賡泉實又曰泉麻又曰苧麻母禮記曰苴

麻之有賡

崔實註苴麻麻之有蘊者苧麻是也

陶弘

景曰苧麻今續苧麻是也

陸璣草木疏云

苧一科數十莖宿根在地至春自生不須別種荆揚間  
歲三刈官令諸園種之剥取其皮以竹刮其表厚處自

脫得喪如筋者煮之用緝蘇頌曰苧根舊不載所出  
州土今閩蜀江浙有之其中可以績布苗高八九尺葉  
如楮葉面青背白有短毛其根黃白而輕虛二月八月  
採王禎曰苧有二種一曰紫麻一曰白苧本南方之  
物近河南亦多藝之寇宗奭曰苧如蓴麻花如白楊  
而長成穗每一朶凡數十穗青白色李時珍曰苧家  
苧也又有山苧野苧凡麻絲之細者為絰粗者為紵  
玄扈先生曰詩言漚紵傳稱紵衣中土之有紵舊矣而  
賈思勰不言種苧之法崔實始言苧麻絲是推之五代  
以前所謂紵所謂泉者殆皆苧麻之屬而今所謂苧者  
特南方有之陸璣始著其名唐甄權乃以入藥方至宋  
掌禹錫云南方績以為布顯是北方所無而釋詩者尚  
未知陸所謂苧  
非詩所謂紵也

大麻即火麻黃麻爾雅翼所謂漢麻也雄者名臬麻牡



# 麻雌者名苴麻

吳普云麻黃是實麻勃是花實中之仁  
先藏地中者及麻葉皆有毒食之殺人

寇宗奭曰麻子海東毛羅島來者大如蓮實其次出上  
郡北地者大如豆南地子小  
蘇頌曰麻子處處種之  
績其皮可以為布農家擇其子之有班黑文者謂之雌  
麻種之則結子繁他子則不結也李時珍曰大麻即今  
黃麻大科如油麻葉狹而長狀如益母草葉一枝七葉  
或九葉五六月開細黃花隨結實大如胡荽子可取油  
剥其皮作麻其積白而  
有稜輕虛可為燭心

# 蘇麻

許氏說文曰蘇枲屬  
爾雅翼云蘇高四五尺或  
五六尺葉似苧而薄實如大麻子或作苧或作蒨

種必連頃故謂之蒨也周禮典枲麻草注草蒨蒨也

王禎曰蘇其長如竹葉大如扇上團如葵花黃結子

蓬如橡斗然  
李時珍曰苧即今白麻多生卑濕處六  
七月開黃花結實如半磨形有齒嫩青老黑中子扁黑

狀如黃葵其莖輕虛北人取皮作麻以莖蕪  
蕪黃作燂燈引火甚速其嫩子小兒亦食之

齊民要術曰凡種麻地須耕五六遍倍蓋之以夏至前  
十日子亦鋤兩遍仍須用心細意抽拔全稠間細弱  
不堪留者即去却一切但依此法除蟲災外小小旱不  
至全損何者綠蓋磨數多故也

農桑緝要種苧麻法三四月種子者初用沙薄地為上  
兩和地為次園圃內種之如無園圃河近井處亦得先  
倒斫土一二遍然後作畦間半步長四步再斫一遍用

脚浮躡或枚背浮按稍實不然著水虛懸再把平隔宿  
用水飲畦明旦細齒把浮耬起土再把平隨時用濕潤  
畦土半升子粒一合相和勻撒子一合可種六七畦撒  
畢不用覆土覆土則不出只須揀用極細梢杖三四根  
撥刺令平可畦搭二三尺高棚上用細箔遮蓋五六月  
內炎熱時箔上加苫重蓋惟使陰密不致曬死但地皮  
稍乾用炊帚細洒水於棚蓋常令其下濕潤

或子未生  
芽或苗出

力弱不禁注  
水陡澆故也

如遇天陰及早夜撒去覆箔至十日後苗

出有草即拔苗高三指不須用棚如地稍乾用微水輕澆約長三寸却擇比前稍壯地別作畦移栽臨移時隔宿先將有苗畦澆過明旦亦將做下空畦澆過將苧麻苗用刀器帶土掘出轉移在內相離四寸一栽務要頻鋤三五日一澆如此將護二十日之後十日半月一澆至十月後用牛驢馬生糞蓋厚一尺預選秋耕擺熟肥地更用細糞糞過來年春首移栽地氣已動為上時芽動為中時苗長為下時栽法掘區成行方圓相去一尺

五寸將畦中科苗移出栽於區內攤土區中以水湮之  
若夏秋移栽須趁雨水地濕分根連土於側近地內分  
栽亦可移栽年深宿根者移時用刀斧將根截斷長可  
三四指栽時成行作區方圓各離一尺五寸每區卧栽  
三二根棋盤相對攤土畢然後下水候三五日復澆苗  
高勤鋤旱則澆之若地遠移栽者須根科少帶原土滿  
包封裏外復用席包掩合勿透風日雖數百里外栽之  
亦活栽培法如前初年長約一尺便割一鎌麻未堪用

再候長成所割即堪績用至十月即將割過根揸用牛

馬糞蓋厚一尺不至凍死

主扈先生曰如此蓋厚則栽得過冬所以中土得種若北

方未知可否吾鄉三十度上下地方蓋厚一二寸即得矣

至二月初把去糞令苗出

以後歲歲如此

壓條滋肩如桑法移栽亦可

第三年根科交肩稠密

不移必漸不旺即將本科周圍稠密新科再依前法分

栽每歲可割三鎌每割時須根傍小芽出土約高五分

其大麻即為可割大麻既割其小芽榮長便是下次再

割麻也若小芽過高大麻不割不惟小芽不旺又損已

成之麻大約五月初一鎌六月半一鎌八月半一鎌唯  
中間一鎌長疾麻亦最好刈倒時隨即用竹刀或鐵刀  
從梢分批開用手剥下皮即以刀刮其白瓢其浮上皴  
皮自去縛作小聚搭於房上夜露晝曝如此五七日晝  
夜自然潔白然後收之若值陰雨即於屋底風前令透  
涼去聲恐經雨黑漬故也所剥之麻春夏秋溫暖時分績  
與常法同若於冬月用溫水潤濕易為分擘也如乾硬  
難分其績既成纏作纓子於水瓮內浸一宿紡車紡訖

用桑柴灰淋下水內浸一宿撈出每纊五兩可用淨水  
一盞細石灰拌勻置於器物內停放一宿至來日澤去  
石灰却用黍楷灰淋水煮過自然白軟曬乾再用清水煮  
一度別用水擺拔極淨曬乾逗成纊鋪經屑織造與常  
法同此麻一歲三割每畝得麻三十斤少不下二十斤  
目今陳蔡間每斤價錢三百文已過常麻數倍善績者  
麻皮一斤得績一斤細者有一斤織布一疋次斤半一  
疋又次二斤三斤一疋其布柔韌潔白比之常布又價



高一二倍然則此麻但栽植有成便自宿根可謂暫勞永利矣

齊民要術曰種苧麻法止取實者種班黑麻子

班黑者饒實雀

實曰苧麻子黑又實而重擣治作燭不作麻

耕須再遍一畝用子二升種法

與大麻同三月種者為上時四月為中時五月初為下

時大率二尺留一科

穧則不成

鋤常令淨

荒則少實

既放勃拔去

雄若未放勃去雄者則不成子實

凡五穀地畔近道旁者為六畜所犯

宜種胡麻麻子

胡麻六畜不犯麻子粗頭則科大收此二種以供美燭之費也

慎勿於

大豆地中雜種麻子

扇地兩損而收並薄

六月中可於麻子地間

散蒺藜子而鋤之擬收其根

汜勝之書曰種麻預調和田二月下旬三月上旬傍雨種之麻生布葉鋤之率九尺一樹樹高一尺以蠶矢糞之樹三升無蠶矢以溷中熟糞糞之亦善樹一升天旱以流水澆之樹五升無流水曝井水殺其寒氣以澆之雨澤適時勿澆澆不欲數養麻如此美田則畝五十石及百石薄田尚三十石穫麻之法霜下實成速斫之其

樹大者以鋸鋸之崔實曰二三月可種苴麻

麻之有實者為苴

玄扈先生曰苧初種用子一種之後宿根自生數年之後根多糾結即須分栽耳今安慶建寧諸處亦多掘根分栽無種子者亦如壓條栽桑趣易成速效而已然無根處取遠致為難即宜用種子之法凡苗長數寸即用糞和半水澆之割後旋澆澆必以夜或陰天日下澆苧有鏽癩又最忌猪糞

又曰今年壓條來年成苧或云月月可栽

又凡種大麻用白麻子

白麻子為雄麻顏色雖白齧破枯焦無膏潤者批子也亦不中

種市糴者口舍今少時顏色如舊者佳如變黑者衰崔實曰牡麻青白無實兩頭銳而輕浮

麻欲得

良田不用故墟

故墟亦良有黥葉天折之患不任作布也地薄者糞之

糞宜熟無

熟糞者用小豆底亦得崔實曰正月糞疇疇麻田也耕不厭熟

縱橫七徧以上則麻無葉也

田

欲歲易

拋子種則節高

良田一畝用子三升薄田二升

概則細而不長

稀則粗而皮惡

夏至前十日為上時至日為中時至後十日為

下時

麥黃種麻麻黃種麥亦良候也諺曰夏至後不浸狗或答曰但雨多濕橐駝又諺曰五月及澤父子

不相借言及澤也夏至後者匪惟淺短皮亦輕薄此亦趨時不可失也

澤多者先漬麻子

令芽生

取雨水浸之生芽疾用井水則生遲浸法著水中如炊兩石米頃出著席上布令厚三四寸數

攪之令均得地氣一宿則芽出水若滂沛十日亦不生

待地白背耨耨漫擲子空

洩勞

截雨脚即種者地濕麻生瘦待白背者麻生肥

澤少者暫浸即出不得待

芽生耨頭中下之

不勞曳撻

麻生數日中常驅雀布葉而鋤

勃如灰便刈

刈拔各隨鄉法禾勃者生收皮不成放勃不收即驪

聚欲小耨欲薄

聚古典反小束也耨普胡反為其易

一宿輒翻之

得霜露則皮壞也

獲欲淨

有葉

者易爛漚欲清水生熟合宜

濁水則麻黑水少則麻脆生則難剥大爛則不任煖泉不

冰凍冬日漚者即為柔明也

衛詩曰藝麻如之何衡從其畝汜勝之

書曰種枲太早則剛堅厚皮多節晚則不堅寧失於早不失於遲收麻之法穗勃勃如灰拔之夏至後二十日漚枲枲和如絲崔實曰夏至先後五日可種牡麻

種大麻法曰十耕蘿蔔九耕麻地宜肥熟須殘年開墾俟凍過則土酥來春鋤成行壟正月半前後下種種子取班黑者為上撒後以灰蓋之密則細疎則粗布葉後以水糞澆灌恐葉焦死亦不可立行壟上恐踏實不長七月間收子麻布包之懸掛則易出

種苧麻法地宜肥濕早者四月種遲者六月亦可繁密處芟去則長

蘇恭曰蠶麻宜九十月採陰乾為佳

農桑通訣曰苧與黃麻同時熟刈作小束池內漚之爛去青皮取其麻片潔白如雪耐水爛可織為毯被及作汲綆牛索或作牛衣雨衣草履等具農家歲歲不可無者

附葛

葛詩葛之覃兮

按葛一名黃斤 一名鹿藿 一名雞齊有野生有家種 春長苗引藤蔓延治

之可作布根外紫內白大如臂長者五六尺葉有三尖如楓葉七月著花累累成穗莢如小黃豆宜七八月採之

採葛法夏月葛成嫩而短者留之一丈上下者連根取謂之頭葛如太長看近根有白點者不堪用無白點者可截七八尺謂之二葛

練葛法採後即挽成網繫火煮爛熟指甲剥看麻白不粘青即剥下長流水邊捶洗淨風乾露一宿尤白安陰



處忌日色紡之以織

葛根端陽日採破之晒乾敷蟲蛇傷平時採之亦可蒸及作粉食

葛花採之晒乾燂食


洗葛衣法清水揉梅葉洗前夏不脆或用梅樹葉搗碎泡湯入磁盆內洗之忌用木器則黑

王禎麻苧圖譜叙曰麻苧之有用具南北不無異同民俗豈能通變如南人不解刈麻北人不解治苧及有溫

浸審生熟之節車紡分大小之工凡絺綌繩綆皆其所  
出今併所附類一一條列庶使南北互相為法云


玄扈先生曰苧性畏寒不宜北土北方地氣所絕無如  
之何然紵衣漚紵即又北方自古有之宜試種為得

刈刀



刈刀獲麻刃也或作兩刃但用鎌柄旋插其刃俯身控  
刈取其平穩便易北方種麻頗多或至連頃另有刀工  
各具其器割刈根莖剝削稍葉甚有速效南東惟用拔  
取頗費工力故錄此篇首著其便也

漚池



漚池漚浸漬也池猶泓也凡藝麻之鄉如無水處則當掘地成池或甃以磚石蓄水於內用作漚所大凡北方治麻刈倒即聚之卧置池內水要寒煖得宜麻亦生熟有節須人體測得法則麻皮潔白柔韌可績細布南方但連根拔麻遇用則旋浸旋剥其麻片黃皮粗厚不任細績雖南北習尚不同然北方隨刈即漚於池可為上法又問之南方造苧者謂苧性本難輓與漚麻不同必先績苧已紡成纁乃用乾石灰拌和累日

夏天三日冬  
天五日春秋

約中既必抖去別用石灰煮熟待冷於清水中濯淨然後

用蘆簾平鋪水面

如水遠則用大盆盛水鋪簾或卓攤蘆浸曝每日換水亦可

攤蘆

於上半浸半曬遇夜收起漚乾次日如前候蘆極白方可起布此治苧池漚之法須假水浴日曝而成北人未之省也今書之冀南北通用

至有理可推廣其意別用之也






亭刮刀



苧刮刀刮苧皮刀也煅鐵為之長三寸許捲成小槽內  
插短柄兩刀向上以鉤為用仰置乎中將所剥苧皮橫  
覆刃上以大指就按刮之苧膚即脫農桑輯要云苧刈  
倒時用手剥下皮以刀刮之其浮皴自去宜制為兩刀  
鐵刀尤便於用


績篋




績篋盛麻績器也績集韻云輯也篋說文曰籠也又姑  
篋也字從竹或以條莖編之用則一也大小深淺隨其  
所宜制之麻苧蕉葛等為之締綌皆本於此有日用生  
財之道也


小紡車





紡車







小紡車此車之制凡麻苧之鄉在在有之前圖具陳茲  
不復述隋書鄭善果母清河崔氏恒自紡績善果曰母  
何自勤如是耶荅曰紡績婦人之務上自王后下至大  
夫妻各有所製若惰業者是為驕逸吾雖不知禮其可  
自敗名乎今士大夫妻妾衣被纖美曾不知紡績之事  
聞此鄭母之言當自悟也

大紡車其製長餘二丈闊約五尺先造地拊木相四角  
立柱各高五尺中穿橫枕上架枋木其枋木兩頭山口

卧受捲纪長軋鐵軸次於前地拊上立長木座座上列

曰以承轆底鐵篋


夫轆用木車成筒子長一尺二寸圍一尺二寸計三十二枚內受績纏

轆上俱用杖頭鐵環以拘轆軸又於額枋前排置小鐵  
叉分勒績條轉上長軋仍就左右別架車輪兩座通絡  
皮弦下經列轆上撈轉軋旋鼓或人或畜轉動左邊大  
輪弦隨輪轉衆機皆動上下相應緩急相宜遂使績條  
成緊纏於軋上晝夜紡績百斤或衆家績多乃集於車  
下秤績分纪不勞可畢中原麻布之鄉皆用之又新置

絲線紡車一如上法但差小耳比之露地銜架合線特  
為省易因附于此




蟠車



蟠車纏纪具也又謂之撥車南人謂撥拊又云車拊南  
北人皆慣用習見已圖於前茲不必述


縷刷




纆刷疏布縷器也束草根為之通柄長可尺許圍可尺  
餘其纆縷杼軸既畢架以义木下用重物掣之纆縷已  
均布者以手執此就加漿糊順下刷之即增光澤可授  
機織此造布之內雖曰細具然不可闕



布機





布機釋名曰布列諸縷淮南子曰伯餘之初作布也

伯餘

黃帝臣也紖麻索縷手經指挂後世為之機杼幅疋廣長疎

密之制存焉農家春秋績織是為要具

行臺監察御史詹雲卿造布之法曰揀一色白苧麻水  
潤分成縷粗細任意旋緝旋搓本俗於腿上搓作纒逗  
成鋪不必車紡亦勿熟漚只經生纒論帖穿苧如常法  
以發過稀糊調細豆麪刷過更用油水刷之於天氣濕  
潤時不透風處或地窖子中洒地令潤經織為佳若風

日高燥則纆縷乾脆難織每織必先以油水潤苧及潤  
纆經織成生布於好灰水中浸蘸曬乾再蘸再曬如此  
二日不得揉搓再蘸濕了於乾灰內周徧滲浥兩時久  
納於熱灰水內浸濕於甑中蒸之文武火養二三日頻  
頻翻覲要識灰性及火候緊慢次用淨水澣濯天晴再  
三帶水搭曬如前不計次數惟以潔白為度灰須上等  
白者落梨桑柴豆稽等灰入少許炭灰妙

北方古有此法今獨肅寧

之用之


鐵勒布法將揀下雜色苧麻水潤分縷隨隨搓

織皆如前法水煮過便是先將生苧麻折作二尺五寸長不斷曬乾蒸過帶濕剥下去粗皮如常法水潤緝搓如前

麻鐵黎布法將雜色老火麻帶濕曲折作二尺五寸長曬乾收之欲用時旋於木甑中蒸過趁濕剥下曬乾以木杷子兩箇夾麻順歷數次至麻性頗軟堪緝為度水潤緝績紡作纊生織成布水煮便是


王禎曰此布妙處惟在不搓揉了麻之骨力好灰水蘸  
曬布子潔白而已雖曰蘸曬頗煩而省纏縈熟蘆等工  
亦多比之南布或有價高數倍者真良法也鏤板印布  
與世之治生君子共之

# 經車



車

繩






繩車絞合經縈作繩也其車之制先立箕虞一座植木止之箕上加置橫板一片長可五尺闊可四寸橫板中間排鑿八竅或六竅各竅內置掉枝或鐵或木皆彎如牛角又作橫木一莖列竅穿其掉枝復別作一車亦如上法兩車相對約量遠近將所成經縈各結於兩車掉枝之足車首各一人將掉枝所穿橫木俱各攪轉候經股勻縈却將三股或四股撮而為一各結於掉枝一足計成二繩然後將另制爪木置於所合經縈之首復攪其

掉枝使經緊成繩爪木自行繩盡乃止凡農事中用繩頗多故田家習制此具遂列於農譜之內


經車續豚臬經緊具也造作箕虞高二尺上穿橫軸長可二尺餘貫以軋轂左手引麻牽軋既轉右手續接麻皮成緊縱纏上軋經縷既盈乃脫軋付之繩車或作別用

車 紉



紉車繲繩器也通俗文曰單繲曰紉揉木作捲中貫軸柄長可尺餘以捲之上角用繲麻皮右手執柄轉之左手續麻股既成緊則纏於捲上或隨繩車用之以助紉絞經緊又農家用作經織麻履牛衣簾箔等物此紉車復有大小之分也

旋椎



旋推掉麻絛具也截木長可六寸頭徑三寸許兩間斫  
細樣如腰鼓中作小竅挿一鈎篋長可四寸用繫麻皮  
於下以左手懸之右手撥旋麻既成繫就纏椎上餘麻  
挽於鈎內復續之如前所成經緯可作粗布亦可織履  
農隙時老稚皆能作此雖繫瑣細之具然於貧民不為  
無補故繫於此

農政全書卷三十六